

Ibu bapa turut risau anak ambil PT3

BH bharian.com.my/berita/nasional/2015/10/88384/ibu-bapa-turut-risau-anak-ambil-pt3

Oktober 12, 2015 @ 11:27am



PELAJAR ketika menduduki peperiksaan Pentaksiran Tingkatan Tiga (PT3) di Sekolah Menengah Kebangsaan Bukit Bandaraya, Bangsar. - Foto Sairien Nafis

KUALA LUMPUR: Sanggup menemani anak sejak pagi adalah pengorbanan yang dilakukan kebanyakan ibu bapa pelajar yang menduduki ujian bertulis Pentaksiran Tingkatan 3 (PT3) bermula hari ini.

Tinjauan BH Online ke Sekolah Menengah Kebangsaan Bukit Bandaraya, Bangsar mendapati ada segelintir ibu bapa yang menunggu anak mereka seawal pagi lagi hinggalah peperiksaan tamat tengah hari ini.

Nooridah Abu, 50, mengakui tidak tidur malam memikirkan anaknya yang akan menduduki peperiksaan PT3 dan bersedia meluangkan masa bersama anaknya bagi memberi sokongan moral.

Beliau yang juga Yang Dipertua Persatuan Ibu Bapa dan Guru sekolah itu berkata, kekusaran ibu bapa ini ditambah lagi dengan kertas soalan PT3 yang dikatakan sebagai agak mencabar.

Disyorkan Untuk Anda

"Saya berjaga malam memastikan persiapan anak saya menjawab peperiksaan PT3. Seawal pagi lagi kami sudah sampai ke sekolah dan lakukan persediaan sebaik mungkin.

"Saya bersama ibu bapa yang lain agak kluatir dengan cabaran soalan PT3 memandangkan tahun lalu keputusan PT3 seluruh negara tidak memberangsangkan. Jadi persediaan perlu agar anak saya dapat menjawab dengan tenang," katanya.

Bagi peniaga, Yurni Salleh, 55, pula beliau terpaksa melupakan perkara lain seketika untuk memberi tumpuan kepada anaknya sepanjang tempoh ujian bertulis PT3.

Katanya, cabaran PT3 menambahkan lagi kekusaran ibu bapa dan berharap pengorbanannya sentiasa ada di sekolah bersama anak dapat memberikan sedikit suntikan semangat.

"Walaupun mereka (anak) tidak selesa dengan kehadiran ibu bapa, sebagai ibu bapa kami ada tanggungjawab untuk sentiasa memberi semangat. Setiap kali waktu rehat peperiksaan, bolehlah membantu anak mengulangkaji bersama," katanya.

Pengurus, Abdul Muluk Hassan, 45, pula berkata walaupun tidak berada sepanjang hari menemani anaknya, dia minta pelepasan daripada majikan untuk melawat anaknya setiap kali habis satu ujian.

"Macam pagi tadi saya hantar dia dan tunggu sampai dia masuk dewan. Sekarang dia sudah habis menjawab satu subjek dan sementara menunggu ujian subjek seterusnya saya datang jumpa dengan dia. Sebab saya nak pastikan dia sentiasa bersedia walaupun terpaksa mencuri sedikit waktu kerja," katanya.

Seramai 465,674 calon menduduki ujian bertulis PT3 yang memasuki tahun kedua itu di 2,667 pusat peperiksaan mulai hari ini hingga Khamis.

Peperiksaan ini menggantikan Penilaian Menengah Rendah (PMR) merangkumi 12 mata pelajaran termasuk Bahasa Melayu, Bahasa Inggeris, Matematik, Sains, Pendidikan Islam dan Kemahiran Hidup Bersepadu.

Subjek lain ialah Bahasa Arab, Bahasa Cina, Bahasa Tamil, Bahasa Iban dan Bahasa Kadazandusun yang diajar di sekolah tertentu.

Konsep peperiksaan PT3 adalah pengurusan dan pemeriksaan skrip jawapan calon di bawah tanggungjawab pengetua sekolah. Lembaga Peperiksaan dan Jabatan Pelajaran Negeri akan menjalankan moderasi pemeriksaan bagi memastikan kesahan dan kebolehpercayaan skor calon.